

Aferamoll gedd der Sargdeggl auf

A Schreinerei aus der Rehauer Geengd iss ninder in Frangnwold umgezoong. Auf ihrn oldn Briddschn-Woong hamm'sa nooch und nooch dess Handwergszeich und die Maschina zer ihrn neia Bedrieb dransboddierd – und zerlezd hamm'sa nuch an frisch gezimmerdtn Sarg auf ihr glans Lassd-Audo nauf geloodn. Der Massder und zwa Gselln hamm sich dann vorn ins Fiehrerhaus nei gezwängd, und der dridda Gsell, der Manfred, iss hindn auf die offna Ladeflächn gegrabld und hot sich aufn Sarg nauf k'hoggd. Dann ging die Fohrd los.

Obber kaum woan'sa auf der B 15 aus Rehau draußn, iss a Gewidder aufkumma. Erschd hot's aweng gedrebld, dann iss der Reng immer schdärger worrn und aferamoll hot's zern schiddn ogfangd, dass'mer gedachd hot, die Welld gedd under. Der Manfred hindn auf derra offna Briddschn hot schnell na Sargdeggl aufgemachd und hot sich zum Schuz vor denner Wassermassn in den leern Sarg nei geleeched und na Deggl zugemachd. Do drinna woar'er vor den Wolknbruch sicher – und Angst hot der Manfred sowieso kana k'habt, wall'er den Sarg doch a boor Dooch vorher selber gschreinerd hot. Warum sollt'er sich dä do net nei leeng, wenn's so arch draaschd?!

A verrdl Schdund schbeeder iss dess Audo min Sarg hindn draaf bei Rot an der Ampl am Berliner Platz in Hof schdeh gebliem. Neemdro schdand a riesicher Bus mit 40 olda Leit, die wossn mit ihrn Seniornheim an Ausfluuch gemachd hamm. Ganz vorn lings woa die 80-jähricha Alma gsessn. „Schaud ner amoll do lings niiber, do liechd hindn auf den Lassd-Woong a Sarg draaf“, hot'sa ganz laud im Bus gschimbld, unner Welld werdd aa fodd schlimmer - ezerd fohrn'sa die Duudn net amoll mehr miteran orndlichn Leing-Auto aufm Friedhof“. Olla Insassn hamm sich die Schand neemdro ogschaud. Und während im Bus sofodd a heffdicha Diskussion iber na Niedergang von die guudn oldn Siddn los ganga iss, hot der Vorfall a dramaddischa Wendung grichd.

Na Manfred iss neemlich im Sarg drinna doch aweng ungemiidlich worrn. Dessweecher hot'er na Sargdeggl von inna an glann Schballd aufgemachd und hot sei rechda Händ aweng raus gschdreggd, um zu briifn, ob's nuch rengd.

Im Bus bei die oldn Leit iss a Dummuld ausgebrochn.

Der Manfred – immer nuch an derra Rot-Ambl – hot inzwischn gemerkd, dass der Reng aufk'heerd hot und iss goa ganz ausn Sarg raus gegrochn. Er hot na Deggl vorsichdich zugemachd und hoit sich widder aufn Sarg nauf k'hoggd. Dann hot die Ambl auf „Grün“ umgscholdn – und dess Audo mit die Schreiner und na Sarg iss weider gfohrn, wie wenn nix gewesn wää.

Annerschd im Bus! Do drinna woa der Deifl los. Olla hamm aufgreechd rum gschriea – und in der driddn, in der elfdn und auf der vorlezdn Reiha sänn drei grauhooricha Männer miteran Kreislauf-Kollabbs vom Siz ro gekibbd. Die Weiwer hamm ihra Handdäschla aufgerissn und mit Kelnisch Wasser in der Luffd rum gschbrizd – und der Busfohrer mussd sofodd ohaldn und a holba Schdund schdeh bleim, bis sich seinä Seniorn von den wundersoma Erlebnis widder einichermooßn erhoold hamm...